

"REGIONALNA DEPONIJ A MOŠĆANICA" D.O.O. ZENICA



**IZVJEŠTAJ
O RADU NADZORNOG ODBORA**

**PRIVREDNOG DRUŠTVA
"REGIONALNA DEPONIJ A MOŠĆANICA" D.O.O. ZENICA
U 2020. GODINI**

Zenica, januar 2021. godine

"REGIONALNA DEPONIJ MOŠĆANICA" D.O.O. ZENICA
- NADZORNI ODBOR-

Na osnovu člana 257. Zakona o privrednim društvima ("Službene novine Federacije BiH", broj 81/15) i člana 29. Statuta Privrednog društva "Regionalna deponija Moščanica" d.o.o. Zenica, Nadzorni odbor Privrednog društva "Regionalna deponija Moščanica" d.o.o. Zenica podnosi, Gradonačelniku Grada Zenica koji u ime Osnivača vrši poslove Skupštine Privrednog društva "Regionalna deponija Moščanica" d.o.o. Zenica, sljedeći:

I Z V J E Š T A J
O RADU NADZORNOG ODBORA PRIVREDNOG DRUŠTVA
"REGIONALNA DEPONIJ MOŠĆANICA" D.O.O. ZENICA U 2020. GODINI

1. Imenovanje Nadzornog odbora

Nadzorni odbor Privrednog društva "Regionalna deponija Moščanica" d.o.o. Zenica imenovan je Rješenjem o imenovanju Nadzornog odbora, broj 02-49-747/17. od 18.01.2017. godine, kojeg je donio Gradonačelnik Zenice postupajući u funkciji Skupštine ovog Društva. Nadzorni odbor je imenovan na mandatni period od četiri godine (2017.-2020.) u sljedećem sastavu:

- Doc.dr.sci **Terzić Edin**, dipl.ing.metalurgije
- **Hasanbašić Zlatko**, dipl.ekonomist
- **Ekmešić Amina**, dipl.ing.mašinstva

Rješenje o imenovanju je objavljeno u „Službenim novinama FBiH“, broj: 6/17 od 27.01.2017. godine.

Konstituirajuća sjednica Nadzornog odbora je održana dana, 26.01.2017. godine na kojoj je za predsjednika Nadzornog odbora izabran Edin Terzić, a za zamjenika Amina Ekmešić.

Osnivanje, djelokrug rada, prava i odgovornosti Nadzornog odbora propisani su Zakonom o javnim preduzećima u FBiH, Zakonom o privrednim društvima FBiH, Statutom Društva, te Poslovníkom o radu Nadzornog odbora.

Poslovníkom o radu Nadzornog odbora detaljnije je uređen način rada Nadzornog odbora, a naročito prava i dužnosti predsjednika i članova Nadzornog odbora, sastav i nadležnost Nadzornog odbora, pripremanje i sazivanje sjednice, tok rada i odlučivanje na sjednici, vođenje zapisnika o radu na sjednici, odlaganje i prekid rada sjednice i druga pitanja od značaja za rad Nadzornog odbora.

U skladu sa navedenim aktima, na sjednicama Nadzornog odbora su razmatrana najznačajnija pitanja o radu i poslovanju PD "RDM" d.o.o. Zenica, a sve odluke su donesene jednoglasno, bez preglasavanja.

Nažalost, dana 08.12.2020. godine usljed bolesti preminuo je predsjednik Nadzornog odbora Edin Terzić, pa je u mandatu ovog saziva Nadzornog odbora posljednje dvije sjednice vodila Amina Ekmešić

2. Razrješenje i imenovanje nove Uprave Društva

U 2020. godini Nadzorni odbor je imao aktivnu ulogu u postupku razrješenja i imenovanja Uprave odnosno direktora Društva, te usklađivanju Statuta Društva u skladu sa zahtjevima Skupštine Društva. U tom smislu Nadzorni odbor je davao prijedloge Skupštini za izmjenu Statuta kako bi se pokrenula i provela procedura izbora i imenovanja direktora, te nadzornog odbora, a koje je kasnije Skupština donijela na osnovu svoje Odluke o izmjenama i dopunama Statuta.

Direktor Društva Zukić Emir je sa danom 16.04.2020. godine ispunio uslove za penzionisanje, pa je po njegovom zahtjevu Nadzorni odbor na svojoj 26. sjednici donio Odluku o razrješenju dužnosti direktora PD "RDM" d.o.o. Zenica, broj: 02-219/20 od 14.04.2020. godine.

Na istoj sjednici Nadzorni odbor je donio Odluku o imenovanju vršioca dužnosti direktora PD "RDM" d.o.o. Zenica, broj: 02-221/20 od 14.04.2020. godine, kojom je za VD direktoricu imenovana Husaković Edina, koja je bila prvi saradnik direktora Zukić Emira obavljajući poslove pomoćnika direktora za tehničke poslove. Imenovana je ovu dužnost obavljala u periodu od 17.04.2020.-15.10.2020. godine, kada je okončana procedura izbora i imenovanja novog direktora.

Na svojoj 27. sjednici održanoj 17.06.2020. godine Nadzorni odbor je donio Odluku o raspisivanju Javnog oglasa za izbor i imenovanje direktora PD "RDM" d.o.o. Zenica. Proceduru izbora kandidata za direktora Društva po objavljenom Javnom oglasu je provela Komisija, koju je imenovao Nadzorni odbor saglasno Statutu Društva. Nakon provedene procedure izbora kandidata, po prijedlogu Komisije i nakon prethodne saglasnosti Skupštine Društva, Nadzorni odbor je izvršio izbor i imenovanje Šabani Adnana za direktora Privrednog društva "Regionalna deponija Mošćanica" d.o.o. Zenica. Direktor je imenovan na mandatni period u trajanju od četiri godine, počev od 16.10.2020. godine. Nadzorni odbor je sa novoimenovanim direktorom zaključio ugovor o radu na određeno vrijeme, te obavezama, ovlaštenjima i pravima direktora Privrednog društva "Regionalna deponija Mošćanica" d. o. o. Zenica, čime je u postpunosti provelo proceduru propisanu Zakonom o ministarskim, vladinim i drugim imenovanjima u FBiH i Statutom Društva.

3. Ostvarivanje funkcije nadzora i rad Nadzornog odbora u 2020. godini

Kao što je to radio tokom protekle tri godine mandata, tako je i tokom 2020. godine Nadzorni odbor nastavio sa svojim redovnim aktivnostima u vršenju kontrole materijalno-finansijskog poslovanja i namjenskog trošenja sredstava na osnovu razmatranja mjesečnih izvještaja o svim operativnim troškovima Društva, koje je za svaku sjednicu dostavljao Menadžment Društva i detaljno obrazlagao. Prateći i analizirajući ostvarene troškove Društva u 2020. godini, Nadzorni odbor je davao ocjenu i konstatovao da su ostvareni troškovi bili opravdani, da su sredstva namjenski utrošena za potrebe poslovanja Društva. Pored mjesečnih izvještaja, Nadzorni odbor je u 2020. godini razmatrao Polugodišnji i Godišnji obračun rezultata finansijskog poslovanja, kao i Izvještaj ovlaštenog revizora o izvršenoj reviziji finansijskih izvještaja Društva za 2019. godinu.

Nadzorni odbor se redovno informisao i o ostalim aspektima poslovanja Društva, kao što je: saradnja i odnosi sa lokalnom zajednicom, provođenje procedura javnih nabavki i realizacija ugovora, naplata potraživanja, uslovi rada na odlagalištu Regionalne deponije, aktivnostima na obezbjeđenju finansijskih sredstava za izgradnju nove kasete i dr.

Rad Nadzornog odbora odvijao se na sjednicama u skladu sa Poslovníkom o radu, a u toku 2020. godine održano je 11 redovnih sjednica na kojima je razmatrano 67 tačaka dnevnog reda i pri tome je doneseno 30 odluka i 37 zaključaka. Sve navedeno je imalo za cilj ostvarivanje uspješnog funkcionisanja Društva i ostvarivanja pozitivnog rezultata poslovanja. U donošenju odluka i zaključaka Nadzorni odbor je, nakon temeljitih diskusija, po svim pitanjima bio jednoglasan.

Nadzorni odbor je na svim sjednicama, osim na posljednje dvije sjednice zbog smrti Predsjednika Nadzornog odbora, radio i odlučivao u punom sastavu. Članovi Nadzornog odbora u radu su ispoljili puni angažman u ostvarivanju obaveza i zadataka iz svoje nadležnosti. Međusobna saradnja članova Nadzornog odbora, kao i saradnja Nadzornog odbora sa direktorom Zukić Emirom, VD direktoricom Husaković Edinom, novoimenovanim direktorom Šabani Adnanom i njihovim saradnicima je bila dobra i korektna.

Na sjednicama su uredno vođeni zapisnici u kojima su konstatovane sve bitne informacije o razmatranim tačkama dnevnog reda, odluke i zaključci, a svi materijali za sjednice su blagovremeno pripremani i dostavljani u skladu sa Poslovníkom o radu Nadzornog odbora.

Nadzorni odbor je na sjednicama u okviru svojih, Zakonom i Statutom propisanih nadležnosti i ovlaštenja, kroz dijalog sa Direktorom, razmatrao i odlučivao o svim bitnim pitanjima vezanim za poslovanje Društva, od kojih posebno izdvajamo:

- redovno na svakoj sjednici je razmatran i usvajan zapisnik sa prethodne sjednice, te analizirana realizacija odluka i zaključaka Nadzornog odbora sa prethodnih sjednica,
- redovno na svakoj sjednici je vršena kontrola materijalno-finansijskog poslovanja Društva, putem uvida i razmatranja mjesečnih izvještaja sa prikazanim prometom na računima Društva, razvrstano po bankovnim računima i dato analitički i u zbirnoj rekapitulaciji,
- također, na svakoj sjednici je razmatrana informacija direktora o aktuelnim pitanjima iz domena rada i poslovanja Društva, kao i informacija o provođenju postupaka javnih nabavki i realizaciji ugovora,
- više puta je Nadzorni odbor informisan o toku implementacije projekta izgradnje nove odlagališne kasete sa pratećom infrastrukturom na RD "Mošćanica",
- razmatranje Izvještaja o godišnjem popisu osnovnih sredstava, opreme i sitnog inventara Društva i Izvještaja o popisu novčanih sredstava (obaveza i potraživanja) Društva sa stanjem na dan 31.12.2019. godine,
- prijedlog Odluke o otpisu i isknjiženju iz knjigovodstvene evidencije osnovnih sredstava Društva,
- prijedlog Odluke o otpisu i isknjiženju iz knjigovodstvene evidencije neispravnih i neupotrebljivih auto-guma, kancelarijskog inventara, sitnog alata i HTZ opreme,
- razmatranje i usvajanje Godišnjeg obračuna rezultata finansijskog poslovanja Društva za 2019. godinu,
- razmatranje i usvajanje Izvještaja ovlaštenog revizora o izvršenoj reviziji finansijskih izvještaja Društva za 2019. godinu,
- razmatranje obrazloženja prijedloga direktora za raspored dobiti ostvarene u 2019. godini i donošenje Zaključka o saglasnosti Nadzornog odbora na prijedlog direktora o načinu rasporeda dobiti iz 2019. godine,

- razmatranje Izvještaja o poslovanju "RDM" d.o.o. Zenica za 2019. godinu,
- razmatranje Izvještaja o radu direktora u 2019. godini,
- kreiranje Izvještaja o radu Nadzornog odbora u 2019. godini,
- donošenje Odluke o razrješenju direktora Društva, zbog ispunjavanja uslova za penzionisanje,
- donošenje Odluke o imenovanju vršioca dužnosti direktora Društva,
- Informacija o donesenim izmjenama i dopunama Statuta Društva od strane Skupštine Društva,
- Odluka o kriterijima za izbor i imenovanje direktora Društva,
- Odluka o raspisivanju Javnog oglasa za izbor i imenovanje direktora Društva,
- Odluka o imenovanju Komisije za provođenje procedure izbora kandidata za poziciju direktora Društva,
- razmatranje Izvještaja Komisije za izbor direktora o sprovedenom Javnom oglasu za izbor i imenovanje direktora Društva,
- razmatranje i utvrđivanje prijedloga Ugovora o radu na određeno vrijeme, te obavezama, ovlaštenjima i pravima direktora PD "RDM" d.o.o. Zenica,
- donošenje Odluke o razrješenju VD direktora Društva, zbog konačnog imenovanja direktora Društva,
- donošenje Odluke o izboru i imenovanju direktora "RDM" d.o.o. Zenica
- razmatranje Zahtjeva Gradske uprave Zenica da "RDM" d.o.o. Zenica organizuje i finansira pranje ceste kroz naselje Tišina,
- razmatranje i usvajanje Polugodišnjeg obračuna rezultata finansijskog poslovanja "RDM" d.o.o. Zenica za period 01.01.-30.06.2020. godine,
- Informacija o podnesenim prijavama na javne pozive za dodjelu grant sredstava,
- razmatranje i usvajanje Pravilnika o izmjenama i dopunama Pravilnika o radu,
- razmatranje i usvajanje Pravilnika o izmjenama i dopuni priloga broj 2. Pravilnika o radu – "Plaće i naknade plaća"
- utvrđivanje prijedloga Odluke o izmjeni Statuta Društva, u skladu sa dopisom Gradonačelnika Zenice odnosno Skupštine Društva, br. 02-45-23330/20 od 23.11.2020. godine,
- prijedlog Plana javnih nabavki Društva za 2021. godinu,
- izbor vanjskog revizora za reviziju finansijskih izvještaja Društva za 2020. godinu,
- razmatranje Izvještaja o donacijama i pomoći lokalnoj zajednici dodijeljenim u toku 2020. godine,
- prijedlog Zaključka o davanju saglasnosti za dodjelu donacija u 2021. godini,
- prijedlog Zaključka o davanju saglasnosti za dodjelu donacija za projekte, poslove i aktivnosti u lokalnoj zajednici za 2021. godinu, te niz drugih pitanja iz nadležnosti Nadzornog odbora i aktuelnih pitanja iz domena rada Društva.

Kao što se iz naprijed izdvojenih tačaka dnevnog reda sa sjednica Nadzornog odbora vidi, Nadzorni odbor se redovno informisao o svim bitnim aktivnostima u radu Društva. O svim zapažanjima i sugestijama su vođene konstruktivne rasprave na osnovu kojih su donošene odluke i zaključci koji su bili u cilju uspješnog rada i poslovanja Društva. Na taj način Nadzorni odbor je bio aktivni sudionik u praćenju i provođenju poslovne politike Društva.

4. Rezime rada i poslovanja Društva u izvještajnom periodu

U finansijskom poslovanju Društvo je ostvarilo ukupan prihod u iznosu od 3.412.422 KM, dok su rashodi iznosili 2.494.062 KM, te na kraju poslovne godine ostvaren je pozitivan finansijski rezultat, odnosno neto dobit u iznosu od 826.001 KM. Ovdje treba imati u vidu da u navedenoj dobiti se nalazi dio oprihodovanih sredstava Vlade FBiH i drugih donatora u iznosu od 268.413 KM, koje Društvo svake godine čini, kako bi smanjilo ukupno porezno opterećenje.

Bitno je ovom prilikom napomenuti činjenicu da Društvo redovno izvršava svoje finansijske obaveze i da je bilo likvidno u svakom trenutku, uz posebnu napomenu da je Društvo izmirilo četiri anuiteta kredita prema Svjetskoj banci u iznosu od 991.900,18 KM. Društvo je zbog smanjenog priliva sredstava uzrokovanog pandemijom COVID 19, te zbog nastanka finansijskih obaveza po osnovu zaključenog ugovora o izgradnji nove odlagališne kasete, plaćalo kreditne obaveze sa malim zakašnjenjem, ali su iste početkom 2021. godine u potpunosti izmirene, tako da sada Društvo nema dospjelih a neizmirenih dugovanja po osnovu kredita Svjetske banke. U tom smislu, Društvo je do sada na ime otplate anuiteta kredita prema Svjetskoj banci (broj kredita: WB-IDA 3672 i WB-IDA 3672-1) sa troškovima servisiranja kredita uplatilo ukupan iznos od 8.580.613,30 KM.

Nadalje, treba napomenuti da je Društvo u 2020. godini realizovalo projekat izgradnje nove odlagališne kasete na Regionalnoj deponiji "Mošćanica" sa pripadajućom infrastrukturuom (izgrađen je sistem odvodnje deponijskog filtrata sa lagunom od 300 m³ i pumpnom stanicom, zatim sistem otplinjavanja kasete i sistem rasvjete oko kasete). Radi se o veoma važnom ekološkom projektu, koji omogućava nesmetano odlaganje otpada na RD "Mošćanica" u narednih 7-8 godina. Bez ove kasete, danas korisnici usluga Regionalne deponije "Mošćanica" ne bi imali gdje odložiti otpad, s obzirom da je kasete prve faze Deponije u potpunosti popunjena.

U tehnološkom smislu Društvo je ispunilo svoju funkciju, jer je i pored svih poteškoća u radu uzrokovanih nedostatkom odlagališnog prostora u kaseti prve faze Deponije, dok nije stavljena u upotrebu kasete druge faze Deponije, te složenosti uslova rada nakon pojave i širenja pandemije COVID 19, ipak uspjelo u kontinuitetu pružiti usluge prijema, kontrole i deponovanja otpada svim klijentima, te uspjelo je održati balans između realiziranih prihoda i ostvarenih troškova poslovanja. Ovo je jedan od bitnih uslova za normalno funkcionisanje Društva za naredni period, u smislu planiranog priliva finansijskih sredstava i ispunjenja obaveza prema društvenoj zajednici i uposlenicima.

Treba još napomenuti da Regionalna deponija "Mošćanica" u kontinuitetu radi već 13 godina i da su neka osnovna sredstva neophodna za rad na Deponiji dotrajala i neophodno je zamijeniti ih novim. Tu prije svega mislimo na nabavku jednog buldozera, bez kojeg je nezamisliv rad na deponijama i za šta je već sada izražena potreba nakon izgradnje i stavljanja u funkciju nove odlagališne kasete. Nabavka buldozera je investicija koja košta oko 600.000 KM i Društvo je potrebna pomoć Osnivača za ovu nabavku, kako bi se mogao odvijati nesmetani tehnološki proces rada na Regionalnoj deponiji. U narednim godinama opredjeljenje Menadžmenta Društva bi trebalo da bude usmjereno na postepeno obnavljanje zastarjele opreme i mehanizacije, koja je već sada amortizovana i čiji će troškovi održavanja biti sve više izraženi.

5. Ocjena stanja u Društvu i rada direktora Društva

Generalna ocjena stanja u Društvu jeste da je Društvo u punom kapacitetu ostvarilo ulogu koju joj je Osnivač povjerio, a to je kvalitetno pružanje usluga zbrinjavanja otpada na ekološki prihvatljiv način u skladu sa Zakonom o upravljanju otpadom.

U ovom izvještajnom periodu bivši direktor Zukić Emir, VD direktorica Husaković Edina i novoimenovani direktor Šabani Adnan su transparentno predstavljali sve aktivnosti Društva, pridržavajući se propisanih procedura. Uvijek su bili dostupni za komunikaciju sa Gradskom upravom, Nadzornim odborom, radnicima, poslovnim partnerima, predstavnicima lokalnih mjesnih zajednica i medija. Redovno su prema Nadzornom odboru upućivali sve akte iz nadležnosti Nadzornog odbora, poštivajući preporuke i odluke Nadzornog odbora.

S toga Nadzorni odbor cijeni da su naprijed imenovani direktori u izvještajnom periodu nastavili praksu uspješnog rukovođenja Privrednim društvom "Regionalna deponija Mošćanica", da su prema imovini i finansijskim sredstvima Društva ponašali se na racionalan i ekonomičan način, te da su stalnim aktivnostima i poslovnom politikom ostvareni planom postavljeni zadaci, što je uticalo da Privredno društvo "Regionalna deponija Mošćanica" d.o.o. Zenica i u 2020. godini više jača i razvija se po svim pokazateljima (tehničkim i ekonomskim). Važno je napomenuti da se uspjeh nije postigao povećanjem cijena pruženih usluga niti kreditnim zaduženjem, nego iniciranim aktivnostima od strane Direktora i zalaganjem svih uposlenih u ovom Društvu.

Imajući u vidu naprijed navedeno, Nadzorni odbor daje **pozitivnu ocjenu o radu bivšeg direktora Zukić Emira za period 01.01.-16.04.2020. godini. Također, Nadzorni odbor daje pozitivnu ocjenu o radu VD direktorice Husaković Edine za period njenog angažmana od 17.04.-15.10.2020. godine, te daje pozitivnu ocjenu o dosadašnjem radu novoimenovanog direktora Šabani Adnana, koji ovu funkciju obnaša od 17.10.2020. godine.**

Zenica, januar 2021. godine



**Zamjenica Predsjednika
Nadzornog odbora**

Amina Ekmešić, dipl.ing.maš.